

Нодир Жонузоқ –
1976 йилда Самарқанд
вилоятининг Булунғур
туманида туғилган.

1998 йилда Самарқанд
Давлат Университетининг
филология факультетини
тамомлаган.

"Томчилар" номли илк
шеърый тўплами "Истеъ-
дод" рукнида чоп этил-
ган. Еш ижодкорларнинг
анъанавий Зомин семи-
нари ғолиби (1997). Хо-
зирда Ўзбекистон телеви-
дениесида хизмат қи-
лади.



*Қўришмаймиз — бепоен само,
Қўришмаймиз энди баттамом:
Сиз Ой каби инқасиз, аммо
Мен Қуёшдай ери баттаман!*

Нодир ЖОНУЗОҚ

Сизни севар эдим



Нодир ЖОНУЗОҚ

СИЗНИ СЕВАР ЭДИМ

шеърлар

«Zarqalam»

Тошкент

2006

«Сизни севар эдим...» Бу сўзларни тилга олмаган ёки ҳаёлидан ўтказмаган киши бормикан?! Севга — инсон бошқини поклайдиган, уни юксакларга кўтарадиган илоҳий куюн, тўфон, аланга... Нодир Жонузоқнинг ушбу тўпламида ана шу соҳир туйғу асосида битилган, турли йилларга мансуб шеърлар жамланган. Умид қиламизки, бу тўплам ишққа ошно кўнгилларга яхши тўхфа бўлади.

Муҳаррир:

Баҳриддин Абусаид

Рассом:

Ортиқали Қозоқов

Техник муҳаррир:

Ихтиёр Саид

Мусахҳих:

Ориф Тўхташ

© Н. Жонузоқ,
2006 йил

Шаррос шеър шўласи

ёки ҳиссий ўт

Тоза туйғу, тоза шеър...

Нақадар оддий, содда ифода. Нақадар кучли, теран қонда. «Сизни севар эдим...» — нинг қўлёзмасини ўқиб, оддийликдан мураккабликкача, соддаликдан теранликкача бўлган сатрлар масофасини, шеърини йўлни ҳисларим билан юриб ўтгандек бўлдим. Бу масофа, бу йўл мени шоирга эмас, ўзимга яқинлаштиради гўё.

Замон шоири шоирлик қиёфаси эмас, бир неча ҳаёт билан яшайди, назаримда. Ишқ-муҳаббат, иш-меҳнат ҳаёти, рўзгор-турмуш ҳаёти, дўст-биродарлар (агар бор бўлса) ҳаёти... Шеър ҳаёти эса уни бу нарсалардан доимо чалғитиб туради. Яшашига халақит беради. Балки шу

ҳиссий ўтга

Нодир Жонузоқ Парфининг «Фақат шоир ҳақи бахтсиз бўлмоққа...» мисрасини эслайди. «Мен-ку яшайман синса-да торим...» — Шоир шу ҳаётнинг барчасида барабар яшаиш азобини бошидан кечирмоқда.

«Сизни севар эдим...» бир неча мустақил

шеърлардан таркиб топган. Лекин китобда ягона лирик қаҳрамон — МЕН бор. У шеърларда ҳам, достонда ҳам тентираб юраверади. Китобнинг охири саҳифасидан кейин эса ёнингизга келиб ўтириб олади. Сиз билан ўтириб-туради. Сиз билан юради...

Уни ҳайдай олмайсиз.

Унинг юраги эрталабки қуёшга ўхшаيدди. Сизга ҳайрат билан қарайди. Дунёни севади. Қўрган нарсалари уни қониқтирмайди. Бировданмас, ўзидан хафа.

Лирик қаҳрамон — Гул. Қўлларгина эмас, нигоҳлар ҳам унга озор беради. У озурда...

Бу китоб ошиқ одамга ўхшабди. Табиатли, руҳли, кайфиятли...

Муҳими шу.

Кимдир китобни маҳзун, кимдир тушкун, кимдир жўшқин, кимдир сокин дейиши мумкин. Тўғри. Лекин бу

муҳим эмас!

Шу шеърлар меники бўлса эди. Кошки... Китобни ўқиса, кишида шундай истак пайдо бўлади.

Лекин бошқага ўхшамаган бу шоир

Нодир Жонузоқ!

Ва ҳамиша шундайлигича қолсин!

Салим АШУР

2005 йил, 16 декабр

Наҳот ишқ дегани сўнгсиз муаммо,
Наҳот бу ғамларнинг йўқдир ҳеч ҳадди?!
Сенинг кўзёшингни билмайман, аммо
Менинг юпатишга сўзим қолмади.

1994

* * *

Бу чексиз коинот ичра бу Замин,
Бу замин ичида ягона Ватан,
Бу ватан ичида ҳорғин бир қишлоқ,
Бу қишлоқ ичида жим-жит бир ҳовли,
Бу ҳовли ичида ҳаёлчан бир қиз,
Бу қизнинг кўксига эса бир юрак,
Юракда нима бор, афсус, билмайман...

1994

* * *

Осмон мовий эмас учгудек,
Жуфт-жуфт қушлар ҳавас келтирмас.
Гуллар гўзал эмас кучгудек,
Гизлаганим гўёки сирмас.

Гўё руҳсиз кўринган ҳар жон...
Шовдираган хазонлар чинми?
Томиримда совигандай қон -
Сени, сени... севмай қўйдимми?!

1994

Севаман -
 Энг яқин дўстимни,
 Ғанимни севаман баттарроқ,
 Севаман баъзида ўзимни,
 Сизни-чи, яна-да қаттиқроқ...
 Севаман -
 Нафратни, гоҳида
 Май янглиғ симиргим келади.
 Савашиб рақобат тоғида,
 Тошларни кемиргим келади.
 Севаман -
 ғалаба тонгини,
 Кўнгли бўш кунларни севаман.
 Севаман юдузлар бонгини -
 Ишқ юки ортилган теваман.
 Севги - кўл, юрагим қайиқдир,
 Ҳар тўлқин солади ларзага...
 ...Ва яна севгимга лойиқдир
 Ҳеч кимса севмаган нарсалар...
 Севаман -
 "Хўш, тағин нени?" деб,
 Жилмайган қизнинг шўх кўзини.
 Севаман...
 Севаман...
 Севаман...
 Севаман "севаман" сўзини!..

Ишонаман сизга, азизим,
 Фақат мени севасиз, фақат -
 Ўшич учун бир менга изн
 Берасиз-у ётга йўқ шафқат.

Турна бўлиб учар қошингиз,
 Қабогингиз шимади шафақ,
 Шаб шаробин ичар сочингиз,
 Кипригингиз - ҳилол, муҳаққақ.

Бармоғингиз атиргулдай хуш,
 Кўйлагингиз ёқаси бурма.
 Кўксингизда гунчалар беҳуш,
 Пойингизга қадалган дурми?!

Нур элаган ойдай юзингиз
 Биламанки, фақат мен учун.
 Демак, чиндир айтган сўзингиз,
 Демак, мени севишингиз чин.

Тун торайиб боради аста,
 Хаёлотта базўр сиғасиз.
 Мени ўйлаб ухлаёлмасдан,
 Ёстиқ тилин тишлаб чиқасиз.

Туйгуларим алдамас сира,
 Ҳеч бир қизни сиздай суймадим.

Тарқаб кетар олис хотира -
Ўзгаради юрак қиймати.

Хумда тиниб пишган гўраман,
Кўҳна майдай кўпирар қоним.
Фақат сизни яхши кўраман,
Фақат сизни ўпаман, жоним!

1995



* * *

Сочингизни ўргим келади,
Лабингизга ботириб лабни.
Кўнглингизни кўргим келади,
Айтсам дейман бир инжа гапни.

Шамолдайин шошасиз аммо,
Совриламан ҳар бир аъмолда.
Юрагимни кўтаролмайман
Суяклари синган ҳаммолдай.

Кўчангизни пойлайман кун-тун,
Кўчага ҳам чиқмай қўясиз.
Тўяжакман ичавериб хун,
Сиз-чи, мени қарғаб тўясиз.

Кетолмайман - юрагим оғир,
Отангизнинг дуойибаъди -
Уриб, ўлиб қолсам ҳам охир,
Остонангиз қабрим бўлади.

Юрагингиз дўндими тошга -
Сиз ҳам битта қалбга эгасиз.
Мени рад қилсангизам, бошқа
Қайси бир суллоҳга тегасиз!?

Қаерим кам? Қўнсангиз агар,
Нима қишти - нима қилайин?!
Сизни дея ичмоғим захар,
Сизни дея яшашим тайин.

Қучоғимни очиб қўйдим ланг,
Қушлар қўнар қўлимга бир-бир.
Келинг, фақат қувиб ҳайдаманг,
Сизни яхши кўраман, ахир.

Сочингизни ўргим келади,
Лабингизга ботириб лабни.
Кўнглингизни кўргим келади,
Айтсам дейман бир инжа гапни...

1995



* * *

Кечирасиз, қўлимдаги най...
Саҳроданми топиб олибман.
Кечирасиз, ўзим ҳам билмай,
Сизни яхши кўриб қолибман.

Кўксингиздан силқиган алам
Кўзларимга куй бўлиб сингмиш.
Қўлимдаги ўйноқи қалам
Чидаёлмай охири синмиш.

Томчилаган ҳар ашқингизни
Ток сувидай симирдим роса.
Талаб қилиб ҳур ишқингизни,
Сархуш кўнглим бўлди дарбоза.

Энди сиз ҳам, азизам, илло,
Кадарларнинг қаҳрин унутинг.
Янги орзу-истаклар ила
Дарвозамнинг дастагин тугинг.

Нима дейсиз - қулоқларим динг,
Ўйлаб кўринг яхшилаб, майли.
Рад қилсангиз, саҳрога отинг
Қўлимдаги шу ўксик найни.

Отасизми, билмадим, фақат
Отсангиз гар, қўл силкиб илкис -
Уни тутиб олади албат
Куй кўйида куйинган бир қиз.

Сўнг у менга дейди: "Ушбу най...
Саҳроданми топиб олибман.
Кечирасиз, ўзим ҳам билмай,
Сизни яхши кўриб қолибман!.."

1995



Дарс

Дарсхонага кирасиз шошиб,
Ёнимдан "ғув" ўтиб кетасиз.
Ўзингизга лойиқ йўл очиб,
Жойингизга қушдай етасиз.

Ўтирасиз (ахир, бу дарс-да)
Ваъзлар сизмас дилхонангизга.
Пичир-пичир қиласиз, аста
Сирғалиб ён дугонангизга.

Ҳис қиламан: ғийбатингиз - мен,
Пўртанадек қўшгим келади.
Сочингиздан тортқилаб, кейин...
Кейин...

...йиғлаб ўшгим келади!

1995

* * *

Оқ олма
Самонинг бўғзида шишади,
Оғзида ёрилар ҳар оқшом.
Бекорга томоғинг тушади -
Ҳали хом, ҳали хом, ҳали хом...

Зард олма...
Жаннатми, дўзахми, аросат -
Боғидан бўйлайди ҳар хобга.
Тишлама - ичи лиқ қарасанг,
Зардобга, зардобга, зардобга...

Қизил олм...
Кўксимда симиллар - сертитроқ,
Йигирма йил қақшаб қишлаган.
Олсанг ол...
Олсанг ол-ку, бироқ -
Бир чети са-а-л-гина тишланган...

...Ол -
ма...

1995

* * *

Сенинг йўқлигингда -
хур қизлар келди,
қитиқлай бошлади инжа бармоқлар...
Жим туравердим.

Бўсалар лабимни қонталаш қилди...
Жим туравердим.

Бурчакка отилди кийимларим ҳам...
Жим туравердим.

Эшик тақилади,
(Сенми эдинг у?!)
Ҳаммаси бир зумда ғойиб бўлди...
Жим...

Сенинг йўқлигингда -
хур қизлар келди,
Бақириб ичимда "керакмас!" дедим.
Сенинг йўқлигингда хур қизлар келди,
Сенинг йўқлигингда мен ўлган эдим!..

1995

Ўлаяшман - ранжиманг тагин,
Қололмайман бу ерда собит.
Атиргулнинг шохчаларидан
Ясаганман ўзимга тобут.

Жар солади мушфиқим - сабо,
Чорлайверар дўсту ғанимни.
Меҳмон бўлган Азроил бобо
Шабнам билан ювар танимни.

Ҳаётимни муқаддас билиб,
Урфу-русум қилурлар ул-бул.
Шеърларимни тиловат қилиб,
Жанозамни ўқийди булбул.

Япроқчалар солади уввос,
Ўксимасин майсалар нега?!
Кўмиламан энг тоза, энг соз,
Энг чиройли гулнинг тагига.

Кўм-кўк рангга киради жониб,
Чайқалади зил-замбил ҳислар.
Юрагимни алвондай ёпиб,
Тобутимни кўтарар қизлар!

1995

- Камалакнинг қайси рангига
осилайин:

оқ,
қизил,
яшил?..

- Камалакни нима қиласан -
Кел, менинг қошларимга осил!

- Ҳисларим - муз, ўтда қайнаган
Қилич керак, умидим - чақин.

- Нигоҳимни ҳилол қайраган,
Келавергин, оласан ҳаққинг.

- Осмон қўймас...

...қушга тўлади -
киприкларим,

қароғим - нурга...

- Кел, кўзларим осмон бўлади,
Қаболарим бўлади турна...

- Мени кўкдан қилмагин жудо,
Менга илоҳ керак, билдингми?!

- Сенга худо керакми, худо -
Кўксимга ҳеч назар қилдингми?!

-О!..

Йиғлама...

Қўйгил... учайин.

Қийнамагил - мен ёш боламан.

Ахир, сени қандай қучайин,

Ахир, қандай қамрай оламан!?

1995

* * *

Уфқ
Лабларингдек
қизил...
Ўшгим келяпти...
Титроқдай кечади турналар...
Қайрилган
кипригим
учида
инжу...

Бўғзим шишиб бормоқда секин,
Жангдан қочиш демак жим турмак.
Сени ўшмоқ истайман, лекин
Ботмоқда юрак -

Қуй...ёш!..

1995

* * *

Сен мени севмадинг...
Қучогим кериб,
Самога учдим-у булутни қучдим.
Ошиқлар назари тегди-ю эриб,
Томчилаб-томчилаб лабингга тушдим.

Марварид, инжу, дур, ёқут, гавҳар, зар -
Эзилиб-тизилиб йўлимни безар.
Ҳисларим долазор ичинда кезар -
Томчилаб-томчилаб лабингга тушдим.

Бир сеҳр кўрдим-у жимирлаб кетдим,
Кўзларим қамашиб, симиллаб кетди.
Юрагим Заминдай қимирлаб кетди,
Томчилаб-томчилаб лабингга тушдим.

Энди мен сенинг энг гизли сиригман,
Энг маҳзун қўшиғ-у гўзал шеърингман.
Заҳардан аччиғ-у болдан ширинман,
Томчилаб-томчилаб лабингга тушдим.

Энди сен нигоҳи қуш қизболасан,
Гоҳ кулиб, гоҳида йиғлаб оласан,
Барибир... сен мени севиб қоласан -
Томчилаб-томчилаб лабингга тушдим.
Тилингда сақлаган сириггни ичдим!..

1995

Ёнаётган дилмас, аслида
 Ёнаётган - шу қовжироқ куз.
 Тарозили чаён фаслида
 Сизни ташлаб кетяпман, афсус...

Тортилади изларим таранг,
 Кўзингизга урилар охир.
 Ўзингизни тутасиз аранг,
 Қўл силтамоқ... барибир оғир.

Нима қилай, қучоғин очса -
 Хувиллаган ёлғизлик тахти.
 Бошимиздан хас-хазон сочса
 Қувраётган олма дарахти...

Тегра - қуюқ, тегра - бўғиқ, дим,
 Икки дилга сиғмас дардимиз.
 Сизни ташлаб кетмасам эдим,
 Мени ташлаб сиз кетардингиз!

Истамайман -
 қароғдек қуриб,
 кейин қумга тўлишингизни.
 Хурлиқодек пок бўлатуриб,
 Гуноҳга гарқ бўлишингизни...

Шунинг учун фидо бўлай деб,
 Балоларга тутаяпман юз.
 Тарозили чаён нишин еб,
 Сизни ташлаб кетяпман, афсус...

1995

Азроил ҳуштагин чалган чоқ
 Қиладиган сўнгги тавофим -
 Пойингизни кучиб йиғламоқ,
 Эй, менинг энг катта Савобим.

Меҳроб бўлар гирдингиз, ёр-а,
 Жойнамозим - нурли соянгиз.
 Сиз тоғсизки, кўксимни ёрар
 Кўзингиздан учган қоянгиз.

Зириллаيمان... Сўнгагим зув-зув
 Эланади - кўпчийди сирлар.
 Юрагимдан тўкилар дув-дув
 Йигирма йил қатланган кирлар.

Бегуноҳсиз... О-о-о... Ҳисларингиз
 Муқаддасдир нақ Самарқанддай.
 Бу даврандан не изладингиз,
 Бу даврада яшайсиз қандай?!

Парчаланар рубобу удим,
 Жаранглайди унсиз қўшиқлар.
 Қўшиқ бўлиб тиңди вужудим,
 Зора, энди руҳим қўшилар.

Руҳим сизга...

Талош жасадим,
 Фажила кўр нигоҳлар чоҳи.
 Гардингиздан масжид ясадим,
 Эй, менинг энг катта Гуноҳим!

1996

* * *

Яшил кўйлақларим тутади бу кун,
Ҳаммасини дунё кийиб кир қилди.
Елкамни синдирди қуёшнинг юки,
Камалақдай таранг пайим қирқилди.

Осмонни чайнаган булутлар - аждар,
Кўзимнинг кўзига пуркайди олов.
Митти юрагимнинг юраги санчар,
Митти юрагимнинг юраги - талов.

Менинг гуноҳим не?!

Зор куттанимми -

Наврўзу Лайлатулқадрда сени?
Сенсиз Қилқўприқдан тоқ ўттанимми,
Кўзларим ёшидан излаб аксингни?

Пиёздай арчилиб боради Замин,
Юракдай емрилар зарба еб, маъюс.
Менинг баҳоримга ким бўлди зомин,
Менинг баҳоримга тегди қайси кўз?!

Тамаки тутуни - титилган руҳим,
Жоним оқ шишада буралар қирқ бор.

Қаро қароғингда қайғу шукуҳи,
Ошпоқ либосларни куйдирган, эй ёр.

Сенинг ҳам, менинг ҳам йўлларим ёнди,
Яшил кўйлағинг кий -
Висол кўламин.
Наврўзи оламда туғилдим, энди -
Лайлатулқадрда ўламан!..

1996



Эшиклар кўнглимни қуйқага кўмди.
О-о-ҳ, дедим,
Майлига, ўтмишим - айро,
Бугуним - ярадор, эртаму қуруқ дард,
Ахлат сочаверинг - гул учун зеро
Ўғит бўлар ҳатто энг чиркин ахлат.

Кимдир мазах қилди ҳиринглаб гизли,
Кимдир қўл силатади изимдан:

"аҳмоқ..."

Ҳайқирдим:

"Кўрсатиб қўяман..."

Сизни...

Мен чакмоқ бўламан,

мен ҳали

чақмоқ...

2

Шони улуғ оғам Пўртана,
Оҳанраболи иним Гирдоб,
Мен ўзимни топыпман яна,
Мен ўзимга берапман тоб.

Тўлқин, менинг оқкўнги синглим,
Йўлга тайёр бўлиб тур ҳар он.
Мен кўчяпман - сезмақда кўнглим,
Қўпажақдир янги бир тўфон.

Посейдон*, хув, кўзголинг, деб айт,
Нух, кемангни сафарга шай де:
Майлига, мен гарқ бўлсам бўлай -
Барибир нилуфар яшайди!

3

Юрагим,
бардош бер,
ўттизми-қирқ йил
Сени кўкрагимга юрайин осиб.
Юрагим, бир куни ёзилса бу тил,
Сен учун бир исм топай муносиб.

Юрагим, балки сен чакмоқдай кўчган
Тигдор туйғуларнинг тугилган туғи.
Юрагим, балки сен нилуфаргулнинг
Кўксимга ташланган митти уруғи...

4

Нилуфар,
сув ичра зерикмадингни,
бақалар жонингга тегмадимми-ей!?
Туфроққўлда қолган шерикларингга
Бугун сен ҳақингда нима хабар дей?

*Посейдон - юнон афсонасидаги деңгиз худоси.

Аҳд қил-у,
шаҳдингда асло кечикма,
кеча бўш бўлган жой эрта бўлар банд.
Аслида мен ҳам энг нодир чечакман,
Истасанг, кел, икков бўламиз пайванд!

5

Томиримиз ёнди - қонимиз қайноқ,
Истироҳат боғи.
Соат кеч 6.
Мажнунтола остида ялаб музқаймоқ,
Юрагимиз баттар аланга олди.
Менга қарамасдинг,
чўғдор нигоҳим
кўзингдан оларди тунларнинг қасдин.
Сенга тикилардим... тикилардим-у
Барибир чехрангни кўрмасдим.
Мен вулқон эдим
уйқуда ётган,
Тушларимни сенга айтардим бир-бир.
Демакки, менинг ҳам тонгларим отган,
Демакки, айлашинг керакди татбир.
Нафасинг иссиғу
қовжираб қолдим,
Лабларингда билдим саринбахш елни.
Тушларингдан сени айириб олдим,
Қучоғингда бир зум ухлагим келди...

6

Ўша куни кечикдинг дарста,
Қирқ дақиқа чидадим, бироқ,
Вужудимни иргитди пастта
Юрагимни ўйган қўнғироқ.
Профессўр фалсафасини
Қабр қазиб, ҳавога кўмдим.
Ташқарига чиқдим сени
Бир йигитнинг ёнида кўрдим.
Кўзларимни тўлдирди бирдан
Кўйлагингнинг қил-қизил ранги.
Фол очгандай сирқироқ сирдан,
Гумбурлади туйғулар жанги.
Хаёлимда қолмади тартиб,
Иродамни айладим горат.
Қўлларингдан қотилдай тортиб,
Юз-кўзингга сочдим ҳақорат.
Сас-садосиз гурладинг лов-лов,
Сас-садосиз йиғлаб юбординг.
Тиғ учида турган қўнғлимни
Киприкларинг тизлаб юборди.
Мажруҳ қушдай потирлаб,
ўксиб -
юлқиландинг... сиқди қучоғим.
(Қанотларинг шунчалар кенгми,
Осмонимга сизмас учоғим!?)

- Ахир, сенга не бўлди, Нилу,
Наҳот юрак - боши бўш кема?!
- Ахир, дўстим бўлади-ку у,
Ахир, менинг гуноҳим нима!?
Жавобларинг мени шол қилди,
Жавобларинг айирди ҳушдан.
Дўсту душман томоша қилди,
Яйраб ғийбат қилди дўст-душман:

"Ким бўлибди бу ўзи Нодир?!
Ҳар куни маст... жин урсин уни!
Билармиди нелигин қадр,
Расво қилди гулдай Нилуни..."

Титраётган танингни кўриб,
Қалтирардим - борлигим беҳол.
Чиндан икки кўзим ҳам кўр-у,
Қўл-оёғим бўлиб қолди шол...
Кўча бўйлаб йиғлаб кетардинг,
(Аламларнинг сурати - йиғи)
Булутлардай йиғилиб дардим,
Оғрийверди кўксим синиғи.
Кўйлагимни парчалаб ечдим,
Қўлларимга бердим минг озор.
Ва... умримда илк бора ичдим,
Мўри бўлиб тутадим... илк бор!

Кипригимда изтироб пишди,
Қийин бўлди тушмоқ ҳовурдан.
Вужудимни зўрға топишди
Жўраларим шомда зовурдан.
Панд ўқишди:
- Не бўлди, Нодир,
Наҳот кўнгила - боши бўш кема?!
- Ахир, севги талаби недир,
Ахир, менинг гуноҳим нима!?

7

Мендан юз ўтирдинг, худди мен
Дарслардан воз кечгандай осон.
Наҳотки, бу ишқнинг удумин
Адо қиломқ анъана ҳамон!?

Шеърларимда шерга хос тоқат
Савол бўлиб сингмоқда оққа.
Нега улкан Заминда "фақат
Шоир ҳақли бахтсиз бўлмоққа"*

8

Сени хафа қилдим,
Ўзимни сўқдим,
Оппоқ гулларини сочди айрилиқ.
Денгиз изларингга изиლაб чўқдим,
Сен эса боқмадинг қайрилиб,
Сени хафа қилдим...

* Рауф Парфи мисраси.

Не бўлса бўлди,
фақат мен истаган нарсалар эмас.
Офтобга чидамсиз чечақдай сўлдинг,
Мен қуруқ хашақдай ўт олдим чарс-чарс,
Нима бўлса-бўлди...
Ҳаммаси аниқ -
Соянгда изғибман янгидай бекорга.
Ишонган нарвоним бўлса-да синик,
Ўзимни осибман энг баланд дорга,
Ҳаммаси аниқ-у...

Чидомайман:

Сен қайда,
мен қайда,
муҳаббат қайда?

Айтган сўзларимни олгим келмас тан,
Шивирлашгим келар сен билан қайта,
Чидай олмайман...

Майли, азизим,
Аҳдинг қаттиқ бўлса,
Изинга қайтма,
Телба туйгуларга бермагил изн.
"Мен ҳам сизни севар эдим" деб айтма,
Майлига, азизим...

Аҳволимизга -
Кимлардир бефарқу кимлардир кулар,
Кимдир ғийбат қилар, биламан... бизга
Ачинса-ачинар нилуфаргуллар.
Фақат...

Фақат...

Фақат...

Сени ранжитдим,
Буюк бир жиноят бўлди-ку содир.
Аслида жобир ким, жабрланган ким,
Аслида хор киму ким бўлди нодир!?
На қилай...

кўксим чўл...

киприкларим ҳўл...

Мен шоир бўламан...

Сен-чи бахтли бўл!

9

Шаҳидлар қонидай қорайди оқшом,
Бош қўйдим. Тушимни ёритди бир нур.
Бир қўлида қилич, бирида Калом,
Мени ҳузурига чорлади Темур.

- Ай, қароғим, кел қани,
Кўзларингда кўрдим дара.
Алҳамдулиллаҳ! Сани
Банди этмиш муҳаббат.

Туркийму у ё араб,
Форсийми ё фаранги?
Ўғлум, кўнглингга қараб,
Пойингга эггум банди...

Й-ў-ў-қ, дедим...

Кўнгилдай ёришди осмон:
Тўлин Ой - Улуғбек Мирзонинг боши,
Сержило қароғи - "Зижи Кўрагон",
Қаламдай қимирлаб турарди қоши.

- Куйган боврим, суйганинг
Қайси бир сайёрада.
Айт, сен учун келтирай
Энг янги тайёрада.

Кундами у Кунсулув,
Ойдаи ё Ойжамол -
Кўнглингга солган ғулув
Кимдир, болам, айта қол!

Й-ў-ў-қ, дедим...

Бошимни кундага тутдим,
Онгимни тилкалаб ташлади бир ҳарб.
Гарчи сирларимни синдириб ютдим,
Тилимдан томчилаб тушди

егги ҳарф:

Н...

И...

Л...

У...

Ф...

А...

Р...

10

Дарс битди.

Сирғалиб дугонанг келди:

- Ўлманг-ей, сизни ким шоир атайди.

Шунчалик ҳам қўпол бўласизми-я,
Кимга фойда араз қилмоқ атайин?!

Ахир, ўзингиз-ку шеърда ёзган ҳам:
"Муҳаббат энг нафис гулдай бежирим!"

Хўш, энди Нилуга етиб олинг-да,
Шоирона қилиб сўранг кечирим.

- Нега сўрарканман, ахир...

- Азизим,

Бунда ортиқчадур "йигитча ғурур",

Ҳар ким маъқулласа ўзининг изин,

Сиз айтган бежирим чечак ҳам қурир.

Ноилож бош эгдим:

- Ҳайдаб солса-чи?

- Вой, қайси юрак-ла юрибсиз ўзи?!

Ҳамма сизга ўхшаб қилмайди аччиқ,

Боринг, ҳайдамайди - кафилман ўзим.